

四庫全書

史部

欽定四庫全書

平定三逆方畧卷五十

康熙十九年正月甲午

命賞賚將軍王進寶趙良棟標兵

上諭兵部將軍王進寶趙良棟標下綠旗兵既恢復漢  
中畧陽諸處又進定四川其酌量加恩賞賚

將軍趙良棟奏復龍安

是月初一日良棟兵從白水壩浮水渡江擊賊

大敗之初三日追至青州石峽溝復敗其伏兵  
龍安府偽總兵姜應熊等詣軍門降我兵遂復  
龍安府

丁酉

命大將軍公圖海速調官兵赴將軍趙良棟軍

良棟奏

臣

往者請於興安一路官兵分撥四千

今到大安驛止有靖寇將軍標兵一千總督標  
兵一千臣不得已選寧夏兵四千五百人畧陽

營四百人平陽營二百人甘肅撫標四百人西  
寧鎮標三千五百人共一萬一千帥之自大安  
驛同將軍王進寶進取四川

上諭大將軍圖海部文到日即速遣趙良棟所調之兵  
不可有悞至興安一路官兵前奏調發四千今疏言  
僅得二千其缺悞之故令總督哈占核明以聞

己亥

命將軍烏丹鄂克濟哈帥師為王進寶等後繼大將軍

公圖海帥師赴漢中

上諭議政王等曰進取四川以滿洲大兵為後應相繼前發最為要策宜令將軍烏丹繼將軍王進寶軍之後將軍鄂克濟哈繼將軍趙良棟軍之後陝西已有將軍張勇提督孫思克巡撫杭愛巴錫等鎮守宜令大將軍公圖海帥師前赴漢中接濟進蜀諸軍糧餉駐鎮疆土鄂克濟哈率漢中滿兵馳往合之烏丹官兵均分統率以為王進寶趙良棟後繼轉餉源源不

絕相隨而進

丁未趣總督楊茂勲等速取重慶夔州

上諭議政王等曰屢命總督楊茂勲提督徐治都等沂江速上直取重慶夔州今兵抵何處進止若何賊情形若何初未奏聞將軍趙良棟攻克白水壩青川招撫龍安去成都逼近恢復非遠將軍王進寶亦分兵三路於此月初旬進逼保寧逆賊王屏藩等困迫必各潰遁楊茂勲徐治都等宜乘機急取重慶夔州勦

禦逆寇其移檄嚴飭趣使進兵如遲延觀望悞此事  
機嚴治其罪

以黃明為援勦總兵官授葉秉忠總兵官職銜

先是馬承蔭標兵餉匱鼓譟承蔭報大將軍簡  
親王喇布即撥餉給發其後理事官麻勒吉等  
上言黃明葉秉忠在賊中俱係偽將軍今同來  
歸誠馬承蔭授為將軍伯而黃明葉秉忠未授  
職銜致兵衆肆行葉秉忠已年老乞休無復異

志惟黃明强悍為柳州官兵所懾服若不調用  
他所終恐為患

上命授黃明為援勦總兵官率馬承廕標兵一千赴將  
軍莽依圖軍前隨大兵進勦雲貴葉秉忠授總兵官  
職銜許其休致

庚戌

命馬承廕標下設立五營

先是



上命馬承蔭設立五營會勦雲貴至是大將軍簡親王  
喇布奏五營兵少應增援勦二營共為七營營  
各一千人

上諭凡將軍標下無設七營之例馬承蔭所屬官兵黃  
明率一千隨征雲貴外廣西省城甚重其更撥一千  
赴大將軍簡親王軍前馬承蔭標下仍立五營兵五  
千叅將守備各官聽其選擇具奏

甲寅授將軍烏丹王進寶進取機宜

上諭議政王等曰將軍趙良棟等軍深入四川保寧重慶夔州諸處速宜平定將軍烏丹王進寶等軍雖抵保寧必於蟠龍山相對立營果爾恐不能無稽時日今宜面蟠龍山分兵堅壘別遣一軍渡昭化江壁錦屏山下滿漢兵合勢以規取重慶夔州則保寧諸處可以即定其趨總督楊茂勳提督徐治都等速即進兵提督王之鼎亦速入蜀會趙良棟軍

乙卯將軍趙良棟奏復成都

良棟率官兵自龍安勦賊是月初四日追至舊  
州明月江賊斷橋守江良棟遂督兵浮水渡江  
擊賊令總兵官王進才等分兩路直取成都而  
親率大兵繼進初八日至綿竹偽勁武將軍汪  
文元迎降十一日至成都二十里鋪偽巡撫張  
文德等率文武偽官二百餘人迎降成都遂復  
丙辰將軍王進寶奏復保寧

十八年十二月進寶兵既復朝天關廣元縣分

三路趨保寧去城二十里據孔道而軍是月十  
三日賊二萬餘來犯進寶分遣官兵大敗之追  
勦至錦屏山破賊四壘賊退寶橋我兵又擊之  
奪橋斬關遂入城賊渠王屏藩偽將軍陳君極  
自經死生擒偽將軍吳之茂等三人偽總兵郭  
天春等十七人保寧遂復

丁巳

命湖廣廣西諸將分路進勦

上諭議政王等曰覽將軍烏丹王進寶等奏我兵大敗  
逆賊恢復保寧偽將軍王屏藩縊死吳之茂張起龍  
就擒將軍趙良棟前奏大敗逆賊恢復成都今正當  
賊衆動搖之際王進寶趙良棟宜同心協力惟期有  
濟大事勦撫餘賊綏輯地方商酌而行作何區畫仍  
令奏聞王屏藩等俱係賊帥王屏藩首級并吳之茂  
張起龍悉解來京諸路將軍等宜乘此時分路速進  
其移檄湖廣廣西諸處大將軍將軍總督提督等咸

使知之

己未

命勇略將軍趙良棟為雲貴總督仍兼將軍

上諭議政王等曰雲貴邊疆重地苗民雜處總督職任  
要重必得才畧拔羣者方克勝任將軍趙良棟勇略  
茂著操守廉潔雖係武職精通文義若任為總督必  
能平定疆域撫綏軍民其改授雲貴總督仍兼將軍

二月辛酉朔

諭湖廣四川諸將進取機宜

上諭議政王等曰今成都保寧皆已恢復乘此事機即  
宜速定雲貴四川既平湖南已屬內地順承郡王貝  
子準達都統范達禮等盡率所部之兵沂江而上規  
取重慶順承郡王等即於重慶駐守將軍烏丹鄂克  
濟哈與趙良棟等同進取雲貴烏丹鄂克濟哈於順  
承郡王軍中簡精兵有馬者將之前行總督楊茂勲  
提督王之鼎駐守成都將軍王進寶駐守四川徐治

都還軍守彞陵及荊州諸處

命都統王國棟等勦禦海寇

巡撫金偁奏海賊謝昌孝李積鳳等不時乘潮  
往來侵掠沿海之地請調平南王藩下都統王  
國棟等前往勦禦之

上諭都統王國棟等身在省會不宜縱賊披猖王國棟  
與副都統尚之璋總兵官甯天祚等其率藩下舟師  
速圖勦禦賊退之後更有侵犯內地者王國棟等與



巡撫金僞會商撲滅

祖澤清父子伏誅

澤清世受國恩歷官至高州總兵官據城以叛及王師討之勢蹙乞降

上賞其罪授鑾儀衛鑾儀使澤清不思宣力贖罪復行叛逆為官軍所執械送京師

上命磔澤清并其子良楨於市諸子家口籍沒入官

命總督楊茂勲等招徠四川流民

戶部上言四川久為賊據苛虐橫征小民相率  
流亡請

勅督撫急行招徠撫綏以副

皇上愛民至意

上命楊茂勲杭愛速赴任督理軍餉并招徠流民俾安  
生業毋悞農時

乙丑

命都督同知高孟等為四川各路總兵官

上諭兵部四川關係重要新經恢復宜簡任素有謀勇  
之人高孟王用予王潮海王進才才畧優長邊疆著  
績高孟仍以都督同知授為鎮守四川北等處總  
兵官王用予仍以都督同知授為鎮守四川松潘等  
處總兵官王潮海以副將授為鎮守四川重慶等處  
總兵官王進才以叅將授為鎮守四川建昌等處總  
兵官

丙寅將軍王進寶等奏官兵復順慶

進寶與將軍烏丹等既克保寧遂遣鎮守西安  
將軍佛尼勒總兵官王潮海等率兵取順慶我  
兵前進沿途招撫益亭潼川中江南部諸州縣  
悉下之正月十八日抵順慶偽知府彭天壽等  
率衆迎降於是蓬州廣安州合州西充岳池營  
山渠縣鄰水儀隴遂寧蓬溪諸州縣相繼悉定

丁卯

命郎中蘇赫臣等運餉給大將軍順承郡王勒爾錦軍

上諭議政王等曰今四川已定楊茂勲等所乘之船俱無所用運饟事關重要郎中蘇赫臣員外郎噶爾薩其親督糧務即以此船載楚餉沂江運致順承郡王軍勿令斷絕有悞軍需

命將軍莽依圖等帥師進取雲貴

上諭議政王等曰成都保寧順慶諸府今已恢復四川底定湖廣大兵今正分道進定雲貴其廣西滿州綠旗大兵休息日久亦當乘機速進大將軍簡親王留

每佐領兵一人於桂林其餘官兵王盡帥之往屯柳州大將軍平南親王可駐守貴縣將軍莽依圖馬承廕都統馬九玉總督金光祖等可各率所部官兵并酌調平南親王藩下官兵分道進取雲貴

戊寅提督徐治都奏復夔州

治都兵抵巫山縣偽將軍楊來嘉等擁衆拒守我兵擊敗之乘勝長驅是月初一日至夔州偽將軍劉之衛率偽總兵瞿洪陞等出降遂復其

城

提督徐治都奏譚洪率所部官兵降

譚洪遣子偽左將軍天祕齋辨明脅從疏及偽  
晉國公勅一廣威將軍印一偽文武官印十九  
偽劄牌八十二并偽官兵數目繕冊送治都所  
是月十三日洪率子姪并駐守雲陽偽總兵地  
晉地升等詣軍門降

庚辰趨將軍烏丹等速進雲貴

上諭議政王等曰今四川底定大兵宜速赴重慶進取  
滇黔否則逆賊復犯重慶亦未可料其移文烏丹鄂  
克濟哈即馳赴重慶精簡士馬進取雲貴

命安置四川投誠官兵

將軍總督趙良棟奏自恢復龍安以來投誠偽  
將軍一人偽總兵二十四人偽副將等官三百  
餘人偽巡撫一人偽司道府廳州縣等官百餘  
人俱應隨宜安插庶免不虞



上諭授誠官兵內可簡總兵官六員設兵三千人即隨  
該將軍進定雲貴其餘皆散為民文官內堪用者暫  
行委署不堪任者旗下官員令其回旗吳逆所屬之  
人察明暫留成都如係各省人民悉遣還本籍

辛巳

命理藩院侍郎達哈塔等核蒙古軍功

理藩院兵部會奏福建諸處凱旋外藩蒙古公  
台吉官兵陝西凱旋鄂爾多斯王固魯等三旗

貝子台吉官兵功績均應議叙若令俱至京師  
人數衆多恐致糜餉宜俟草青時令齊集適中  
道理藩院遣官四員兩路分往察核軍功案籍  
照例議叙

上諭議叙軍功事關重要其令理藩院侍郎達哈塔至  
彼察核兵部員外郎杜稜偕往



平定三逆方畧卷五十

欽定四庫全書

史部

平定三逆方略卷五十一至五

詳校官編修臣曹振鏞

編修臣裴謙覆勘

總校官候補中書臣潘有為

校對官中書臣李斯咏

謄錄監生臣邵延曾

欽定四庫全書

平定三逆方略卷五十一

康熙十九年三月辛卯將軍烏丹奏復重慶

烏丹等所遣署副都統覺和托等於二月十六

日至重慶偽文武官出城迎降於是達州東鄉

太平新寧南江安岳等州縣悉定偽將軍楊來

嘉彭時亨等亦各遣人詣軍門繳印投誠

乙未遣刑部侍郎宜昌阿等赴廣東

時尚之信護衛張永祥張士選赴京首告之信

謀叛事

上因命刑部侍郎宜昌阿等以巡視海疆赴廣東按其  
狀并令議政王貝勒大臣集議既議政王等議  
奏

上諭令宜昌阿等攜帶張永祥張士選以往密詢都統  
王國棟副都統尚之璋若事有實迹國棟等自任能  
執之信即一面奏聞一面赴潮州頃之信具疏自請

撤還會城此疏其以不准行檄知之宜昌阿等抵廣  
東日詳察情形如應撤還即具疏言會城不可無之  
信彼時當獨調之還宜昌阿臨事之時毋多株連儻  
有意外聽酌便行事是日宜昌阿等啓行

戊戌

上親勞大將軍安親王岳樂於蘆溝橋

先期

上諭兵部大將軍和碩安親王等兵雖有微罪然擊敗

逆賊立有功績朕親往迎勞爾部遣人諭王振旅而  
入苟疾急馳還使步伍不齊將失勞軍大體諸應行  
禮儀悉如大將軍信郡王等儀注行及岳樂至

上親迎之蘆溝橋

辛丑

命都統夸扎自武崗州率兵赴廣西

大將軍簡親王喇布奏

臣

親帥兵赴柳州二月

二十八日至永福縣聞馬承蔭反給傅宏烈登



舟遣兵襲破其營臣等即欲進勦因滿兵力薄  
又念省城至重公議暫還桂林

上諭覽奏馬承廕復叛今湖廣綠旗兵已取楓木嶺武  
岡州滿漢兵甚多廣西去武岡為近宜調貝子彰泰  
軍中滿兵每佐領六人綠旗精兵二千人令都統夸  
扎帥之速赴簡親王軍前與平南親王等協力勦賊  
夸扎至廣西即令叅贊軍事

命將軍噶爾漢帥師守荊州諸處

大將軍順承郡王勒爾錦等言將軍噶爾漢之  
兵若留之荊州防禦地方誠有裨益

上允所請即命噶爾漢以兵駐守荊州諸處

壬寅

命都統馬奇等率兵赴廣西

上諭議政王等曰前遣往廣西大兵勞苦日久宜酌量  
發兵番休可撥京師每佐領護軍二人漢軍一千人  
令都統馬奇趙璉副都統洪世祿祖植椿等率往更

替

癸卯

命將軍賴塔帥師守廣東

上諭兵部今大敗海寇攻克廈門金門諸處閩疆悉定  
頃簡親王奏馬承蔭反恐此賊自廣西侵犯廣東且  
廣東海寇方張所係匪輕將軍賴塔以文到日即率  
滿兵二千馳赴潮州防守廣東全省

臣謹按是時尚之信陰蓄不軌有復叛之形

為所部張永祥等首告

皇上即遣侍郎宜昌阿往按其事復慮粵城無滿兵彈  
壓倉猝變生難以驟制乃亟

命賴塔帥兵赴潮防守全境雖由馬承蔭復反海寇方  
張實恐廣城或有意外便於就近剿除也迨  
宜昌阿抵粵遵奉

密諭中夜調賴塔來赴會城所以之信被執後其黨與  
雖爾作亂旋為我兵所擒不致蔓延以滋疆

域之害

皇上籌畫幾先運用不測誠可為至神密矣

甲辰尚之信請進取武宣

上許之

先是將軍莽依圖移文約之信由貴縣至賓州  
會師協取柳州至是之信奏總督提督官兵合  
為一路兵勢始盛今臣等定議臣可無往賓州  
會鎮南將軍之師即從貴縣同督提二臣由潯

州水陸進取武宣

上報可

戊申大將軍貝勒察尼奏復辰州

是月十三日我兵抵辰州賊潰遁偽知府傅祖祿等以城降偽將軍楊有祿周禎楊寶蔭祖述舜等各率兵來歸未幾將軍總督蔡毓榮亦奏復銅仁府瀘溪淑浦麻陽三縣

逆賊吳之茂韓晉卿伏誅遣張起龍招撫雲貴

時王屏藩陳君極首級及之茂晉卿起龍送至  
京兵部以

聞

上諭吳之茂韓晉卿即凌遲處死與王屏藩陳君極首  
級同懸示衆又

諭議政王等曰今楓木嶺辰龍關諸險隘俱已恢復四  
川廣西悉皆底定雲貴不日可平若行招撫更可速  
定雲貴人民得早安其生張起龍本吳三桂旗下之

金史卷一百一十五  
人宜使招撫雲貴可貫其死俾捧勅前往

壬子將軍總督趙良棟奏進兵機宜

上從之

良棟奏湖廣大兵若作速前驅賊自奔潰請

勅湖廣官兵限以立取貴州令廣西兵一路自泗城州

渡八答河由安籠出雲南交水一路自思恩府

渡八磳青羊江由廣南府出雲南維摩州四川

兵一路自城都府走黎雅天全招討司過大渡



河即由瀘江建昌會川金沙江出雲南武定府  
一路自保寧府下七星關或走永寧出烟方堂  
堂可渡橋并請

勅各路將軍大臣嚴督滿漢官兵加意秣馬川陝督撫  
等迅備糧餉湖廣廣西統兵將軍速整軍旅訂  
期八月終諸路齊進直搗雲南

上諭趙良棟身在行間熟悉地方情形具疏入告宜悉  
如所請錄其疏發湖廣廣西將軍大臣視雲南可取

金史卷之四十一  
或賊內亂有機可乘毋俟定期即便宜帥師直進苟  
未有機會其以趙良棟所奏訂期進兵機宜詳加商  
酌於何所約會齊舉定議以聞

癸丑

命禁官軍擄掠

時遣學士佛倫等赴滇黔理餉

上因諭之曰大兵進勦雲貴務安輯民人撫綏苗蠻若  
肆行擄掠則賊寇不息賊寇不息則大兵何日得旋

可傳諭將軍總督巡撫總兵官俾咸知朕意若等係特簡大臣軍士有妄行擄掠者令立行叅劾

甲寅

命馬山等赴將軍總督趙良棟軍前

上諭兵部曩者有事之時所選發人員之中馬山偏圖勞績屢著軍務素嫻四十六亦堪任使宜用之邊疆重地可發往將軍總督趙良棟軍前若四川需用即授為總兵官否則令趙良棟帥之隨征雲貴即於要

地任用其標下官兵願隨者攜往準出征例給與糧餉此等人員爾部詳察議奏

已未

命將軍總督趙良棟等堅守四川要路

上諭議政王等曰四川與雲貴接壤通道頗多逆賊必乘間來犯頃覽將軍總督趙良棟奏我兵已抵金沙江其檄趙良棟烏丹鄂克濟哈等當此進取之時宜於各要路立營深溝高壘堅為守禦其守兵糧餉運

致母悞

四月壬申

命大將軍康親王傑書發兵赴將軍賴塔軍

賴塔奏所部兵二千鎮守廣東全省設遇警他  
援兵力單弱請增發二千人

上命康親王更以兵一千增遣將軍賴塔軍前其餘或  
悉帥還京師或酌量留之先後還京詳議以聞

戊寅

命耿精忠來京

精忠奏今逆賊敗遁恢復海澄閩疆悉定圖報

有心効力無地伏懇准臣赴

闕待罪

上命精忠來京尋以精忠所屬阿思哈尼哈番徐鴻弼等首告精忠雖已歸降仍懷反叛遣王進功潛通海賊與劉進忠密語結為心腹偕徐文輝等晝夜密謀勾連海寇又不收繳軍械潛埋黑鉛

於王昇家欲俟大兵旋日復行反叛隱匿奸細  
於投誠時殺死總督范承謨以滅口又遣王于  
王許應兆往吳逆處乞援

命議政王貞勑大臣集議議政王等勘審俱有實迹分  
別擬罪具奏

上諭耿精忠革去王爵可即凌遲處死其子耿顯祚革  
去散秩大臣可即處斬徐文輝王世瑜白顯中江元  
勳曾養性王振邦蔣得輅劉進忠俱即凌遲處死黃

國瑞林芳孫廖廷雲李似桂夏季旺呂應斗武灝司  
定猷沈偉郭景汾羅萬里祖宏勲陳議陳斌呂八俱  
即處斬耿精忠劉進忠首級仍梟示田啟蛟金鏡李  
學詩陳夢雷俱從寬免死內係旗下人給與本主為  
奴係民入官給與新滿洲披甲之人為奴

已卯許將軍王進寶還固原治疾

先是進寶子用予面陳松潘已屬內地願隨征  
自効至是進寶奏舊病愈深乞解軍職



上諭卿久鎮巖疆勞績素著進勦四川克奏捷功地方  
初定倚毗方殷覽奏以病乞休言甚懇切其還固原  
任所調攝卿子王用予既願隨征効力卿標官兵令  
其暫統駐保寧俟進取雲貴之日隨征協勦

壬午

命大將軍貝子彰泰等量率湖廣滿兵進雲貴餘撤還  
京師

彰泰奏留守武岡州每佐領驍騎二人有奇已

選其中有馬者先令赴大將軍簡親王軍又自沅州撥每佐領護軍二人驍騎三人亦選有馬者及總兵官趙應奎并其標兵三千餘人俱令都統夸扎率之前往馬瘦及無馬者見留臣軍候

旨調遣

上諭今大將軍貝勒貝子大兵俱抵沅州總計兵數每佐領二十人有奇又總督董衛國蔡毓榮提督趙賴

桑額周卜世等兵甚多皆由鎮遠一路進取貴州值  
此廣需糧餉之際大將軍貝勒貝子等於前發兵內  
視無馬不能行者遣每佐領若干人還京師率滿兵  
每佐領若干綠旗兵若干進取雲貴集議速奏遇有  
機會仍進發毋失

平定三逆方畧卷五十一

欽定四庫全書

平定三逆方畧卷五十二

康熙十九年五月丙申

命將軍額楚暫守南寧

先是令額楚帥師還江寧至是額楚奏報馬承  
廕叛於柳州將軍莽依圖等率大兵進勦今聞  
賊將何繼祖王宏勳等兩路來侵

上命額楚帥師暫守南寧俟莽依圖等平定柳州仍還

駐江寧

庚子

命大將軍貝勒察尼帥師暫屯沅州

察尼奏

臣

兵向在常德兩月未支芻菽馬皆羸

瘦後雖補給尚未充肥今自常德進取辰沅沿

途霖雨泥濘疲乏遺棄者甚多軍士或有徒步

僅能達沅州者且自三月二十日糧盡迄今猶

未運致

上諭貝勒察尼帥師暫屯沅州如將軍趙良棟所奏約  
齊舉行若此際有可進雲貴之機仍毋俟定期酌量  
進發其糧餉稽悞之故令巡撫韓世琦察明具奏

辛丑

命諸將稽察吳三桂與達賴喇嘛交通書札

上諭兵部移文各路大將軍督撫提鎮等凡有平定雲  
貴恢復城池者俱令察訪吳三桂與達賴喇嘛相通  
書札隨得隨繳兵部

乙巳

命大將軍貝子彰泰等遣送偽將軍吳有爵崔世祿來

京師

彰泰等奏沅州既克偽將軍吳有爵崔世祿等  
率衆降

上命遣送來京

己酉將軍總督蔡毓榮奏官兵復思南

毓榮遣隨征總兵官鄧秉志等進取思南是月



十二日至太平關擊賊敗之隨三路進勦賊棄城遁十四日我兵復思南府

贈總督范承謨太子少保兵部尚書

先是范承謨為耿精忠給至其家置刀鋸於前脅令順從承謨正色詆訶不為屈服賊因拘禁獄中又百端逼誘承謨堅貞彌厲於康熙十五年九月十六日夜遂為賊所害至是福建巡撫楊熙察明以

聞

上諭范承謨可贈太子少保兵部尚書廕一子入監讀

書

甲寅遣理藩院郎中詹璧喇往邊地偵探

上諭詹璧喇曰爾往駐松潘等處凡有聞見當如拉篤  
祐不時奏報遣爾前往之故明諭厄魯特達賴巴圖  
魯台吉知之然達賴巴圖魯台吉等消息亦應密探  
若得賊寇交通書信即以奏聞并探往來貿易者凡

奉使邊陲潛行訶察良非細故爾無攻戰專聞之任  
宜慎自防護藏形歛跡常近大軍左右偵探奏報

丁巳贈巡撫馬雄鎮太子少保兵部尚書

當孫延齡叛時雄鎮為其所執脅令降服雄鎮  
罵賊不屈同妻子家口殉難至是將軍巡撫傅  
宏烈察明以

聞

上諭馬雄鎮可贈太子少保兵部尚書廕一子入監讀

書

贈總兵官吳萬福太子少保

當耿精忠叛變時福寧總兵官吳萬福嬰城固守不甘從逆為賊所殺至是巡撫楊熙察明以聞

上諭吳萬福可贈太子少保廕子弟一人以守備錄用

六月戊午朔

命大將軍貝勒察尼率兵還京師

察尼等奏臣等合計兩軍共前鋒四百有奇護  
軍驍騎每佐領二十餘人內留前鋒三百人每  
佐領護軍六人驍騎九人進取雲貴餘悉還京  
師

上命貝子彰泰帥師進征貝勒察尼察滿兵出征在先  
効力勞苦及無馬者帥之還京

癸亥以李芳述為隨征總兵官

將軍總督趙良棟奏投誠總兵李芳述先曾拒

絕僞命率衆來降今復能固守孤城不為賊誘  
請破格加恩

上諭李芳述為隨征總兵官隸趙良棟標下隨征効力  
丁卯提督桑額草職總兵官周邦寧降級俱留任  
戴罪圖功

先是以桑額等自常德澧州退還

上命大將軍察取供詞至是大將軍貝勒察尼取供具  
奏事下兵部議兵部奏言桑額職任總統調度全省

官兵一聞賊警不即馳赴常德以扼要害乃遷延日久始自荊州進發致常德為賊所據又不入守澧州但於城外駐營六日復致澧州被陷且稱桑陵一路賊警甚急托故引還應行革職周邦寧偕桑額赴常德時託病留澧州迨桑額還自常德又不入澧州防守即同桑額奔還應削去所加五級仍降一級調用

上諭桑額可革職周邦寧可削去所加五級仍降一級

俱畱原任戴罪圖功

將軍總督趙良棟奏官兵敗賊於永寧

四月八日賊以勁卒犯永寧官兵鏖戰彌日賊猶不却投誠總兵官李芳述等奮勇衝擊斬偽總兵毛有貴等賊始大敗遁逃陣斬凡千餘人

丙子

命將軍賴塔等安撫平南王下兵

時賊流言欲分調平南王所部兵往雲南安置



各營於是藩兵八千人聞之盡恐五月十三日夜遂鼓譟拔營遁歸巡撫金僞以

聞

上命將軍賴塔侍郎宜昌阿總督金光祖巡撫金僞都統王國棟等設策安撫逃兵發赴廣西

壬午

命大將軍康親王傑書率兵還京師

先是令傑書等議奏旋師事宜至是傑書奏今

當需餉之時在閩大兵理宜全撤但福建投誠之人甚多金門廈門諸處新經恢復人心未定宜留大兵一千二百人駐守福州六百人駐守泉州一千二百人駐守漳州餘兵臣與叅贊副都統銜禪布先率入京至於沿海綠旗官兵設防之外孰宜先撤孰宜鎮守應令尚書介山侍郎吳努春溫岱等會同總督巡撫提督議覆

上報可

大將軍簡親王喇布奏復柳州馬承廕降

喇布與將軍莽依圖總督金光祖等率滿漢官  
官兵分路進剿承廕五月初四日光祖兵敗賊  
於武宣遂復縣城初八日莽依圖兵大敗賊於  
陶登乘勝前進遂定象州喇布兵於是月初四  
日至雒容縣即進取柳州十七日承廕率衆詣  
喇布軍門降柳州平

七月辛卯

命內閣學士薩穆哈往廣西分置馬承廕標下兵

安塘筆帖式報大將軍簡親王兵距柳州二十

里馬承廕等迎降

上諭初馬承廕及所部官兵背叛蹂躪疆土擾掠生民  
罪惡已極後見湖南平定廣西恢復窮迫請降朕欲  
生民早獲寧息悉貫前罪封以伯爵授為將軍仍令  
管兵標員亦分營補用及大兵規取雲貴無故背恩  
復叛致悞征討大事今緣大敗兵臨勢威復窘急來

歸令學士薩穆哈速往撥滿漢官兵押送馬承廕及  
標下守備以上官來京其標兵令督撫提鎮等分隸  
各營汰其老弱徇兵亦宜散置切勿令其黨聚廣東  
諸處被難人民詳察遣還故土提督哲爾肯可屯駐

柳州

乙未嚴飭川陝督撫協運蜀餉

時總督哈占請秦餉由略陽陽平運至保寧令  
四川督撫接運至叙州巡撫杭愛復言四川官

員部選者俱未蒞任且民間無船實不能接運  
上諭蜀撫既以官少船缺為言仍令陝西總督哈占巡  
撫鄂愷甘肅巡撫巴錫即以略陽糧艘運官竟運至  
叙州四川督撫速趨空船使回大兵進勦雲貴需餉  
至急既已尅期進取輓運無過今秋川陝督撫自宜  
殫心籌畫勿悞軍需乃妄分彼此互相推諉遲延至  
今殊負職任嗣今當同心商酌不拘疆界速為饋運  
無悞進取如仍推諉遲延有失軍機經管督撫以下

各官俱以軍法從事

將軍王進寶請撤還所部兵

上不許

進寶言

臣

標官兵歷歲從征備嘗艱苦今蜀疆

底定督撫提鎮已各設營兵請量選

臣

標官兵

付臣子用予率之進勦被傷及從征日久者令

暫還本汛議政王等議從其請發陝西兵以補

其撤還之數

金少臣  
卷五十二  
上諭進取雲貴期在八月若撤還王進寶兵復以陝西  
兵補足往返商畧必誤進剿機宜關係非小王進寶  
所奏不准行

乙巳禁官兵騷擾驛遞

浙江巡撫李本晟言大將軍康親王奉

命旋師浙省河路額設驛船甚少大兵往至蘇州若不  
行更換仍越站遠送則後至官兵無以應給請  
命江寧巡撫備船更易



上允其請因

諭兵部曰聞官兵往來每有借端船艚勒索地方所用  
人夫額外多派或折價肥己鞭撻繯夫侵漁小民擾  
累郵驛該管官不加約束地方官復科歛隱諱弊端  
種種殊屬可惡嗣今宜嚴行禁戢若仍前不悛必重  
懲不貸

丁酉革左都御史覺羅舒恕職

先是舒恕以病還京

上諭議政王等曰左都御史覺羅舒恕當進定廣西之時奏稱病劇乞還肇慶調治朕以舒恕身為將軍病篤必真令其暫回肇慶後又以敕印私繳將軍莽依圖令莽依圖代為題請朕以舒恕之病危篤欲其生還召還京師今觀舒恕全無病狀神色如故舒恕前在高州奔回肇慶復自廣州敗還不據韶州南雄諸要地竟還贛州江西全省因而震動及在江西又復擄掠大擾百姓以巡撫金儒之言盡洩於平南王又

恐嚇將軍巡撫傅宏烈云汝若題請進兵我必殺汝  
舒恕身為將軍負如許重罪不思戮力以贖罪愆反  
詐稱患病凡為將帥者儻皆如此肆行欺罔軍法何  
以得申舒恕應羈候宗人府俟旋師之日嚴察議奏  
至是議政王等議革舒恕左都御史佐領及世  
職籍沒家產

上報可免其籍沒

戊申

命將軍總督趙良棟等酌調綠旗官兵

時四川分兩路進取雲貴將軍烏丹趙良棟等  
請調綠旗官兵

上諭趙良棟曾任陝西提督烏丹等在秦亦久地勢軍  
機知之甚悉綠旗兵作何調發畱守公同詳議一面  
調遣一面奏聞已而烏丹等奏雲南乃逆賊根本彼  
必死守進征官兵不可單弱永寧建昌兩路各  
得兵二萬方克有濟除四川見兵外其不足之

數已移文大將軍公圖海總督哈占速於各路  
調足發往

已酉

詔大將軍順承郡王勒爾錦還京師

先是

上命勒爾錦赴重慶勒爾錦不能前進半途而返因具  
疏自劾請解大將軍任准發沅州軍前効力

上諭勒爾錦既託故還荊州又奏請發沅州効力不合

其攜大將軍勅印率所屬護衛各官王府佐領兵同  
沅州官兵還京

壬子將軍侯張勇奏請率兵往鎮四川

上不許

張勇言總督哈占移稱將軍趙良棟請調涼州  
鎮兵三千今將軍王進寶已還固原治疾請令  
提督孫思克還兵駐甘肅涼州鎮守河西臣率  
本標兵三千往守四川庶不悞進勅

上諭秦省乃邊疆要地將軍侯張勇毋往四川仍防守  
秦中今進取雲貴期迫若調沿邊之兵恐致有悞張  
勇簡標兵三千令賢能官率之速赴四川

癸丑

命將軍賴塔等勦撫廣東叛兵

總督金光祖言平南親王藩下鼓譟逃亡之兵  
烏合肆行臣見與賊對壘不能兼顧

上諭近報將軍賴塔都統王國棟遣總兵官甯天祚等

率兵勦撫鼓譟之兵若甯天祚等力不能勦將軍賴  
塔巡撫金僞提督侯襲爵都統王國棟公同酌議增  
兵速行勦撫以靖疆圉

平定三逆方畧卷五十二



欽定四庫全書

平定三逆方畧卷五十三

康熙十九年八月庚申

命量撤福建大兵

上諭兵部廈門金門諸處悉設兵防守福建大兵宜量  
行撤還將軍拉哈達副都統馬思文率千人守福州  
副都統吉勒塔布沃伸巴圖魯率千人守漳州兩軍  
悉令拉哈達統轄餘兵一千令尚書介山侍郎吳努

春率之回京

詔定福建經制兵

上諭兵部福建瀕海要區總督提督標下可各設五營  
兵五千人巡撫標下設二營兵千五百人至通省防  
守兵依舊額畱五萬一千七百五十人餘一萬九千  
九十五人悉行裁汰提督駐鎮海澄其銅山廈門諸  
處分設總兵官副將鎮守見在水師畱二萬人汰其  
餘五千

甲子

勅將軍烏丹等取雲南

先是議令大將軍貝子彰泰等由沅州取貴州  
大將軍簡親王喇布等由廣西取雲南將軍烏  
丹趙良棟會兵取遵義後亦進貴州至是彰泰  
以貴州地方徧小難以得糧為言

上諭將軍烏丹等得遵義後毋經貴州即進取雲南大  
兵進剿之期定議奏聞後即檄湖廣廣西大將軍將

軍等如期會舉

戊辰

詔責將軍總督蔡毓榮

毓榮請特降

勅旨招撫逆賊吳世璠兵部議從其請

上諭閣臣曰吳世璠為賊渠魁恃其險阻抗拒官兵殘害生民罪惡重大朕勅炳如日星豈可輕頒且賊勢迫自行納款如未至窮蹙雖招徠何益況前招撫賊

將吳應麟胡國柱勅內具有曉諭世璠歸誠其功更大之語蔡毓榮不圖早滅逆寇乃欲降勅招撫不揆事理率意妄奏兵部竟議准行均屬不合此疏可付兵部令該部密行嚴飭

臣謹按逆賊吳世璠乃三桂孽孫負固抗順毒害百姓罪大惡極誠神人所共憤天地所不容故其他黨附之徒或可原情受納若世璠者斷不可輕議撫納稍行寬貸者也蔡毓

榮闇於大義請降

勅招撫世璠

皇上念渠魁不誅無以為亂臣賊子戒況我大兵齊進  
剪滅何難乃不允所請嚴飭毓榮未幾我兵  
果奪賊諸險直薄滇城世璠旋即授首羣醜  
盡殲人心靡不稱快蓋惟我

皇上能正天討彰國法所以聲靈赫濯薄海內外罔不

寧謐

廟謨深慮毓榮輩焉能揆測萬一也哉

已已

詔諭廣東藩下兵

上諭兵部前因尚之信屬員張永祥等首之信諸不法  
事朕欲明其真妄故令之信來京非以永祥所言皆  
真必欲治之信以法也平南藩下官兵本朝養養四  
十餘年世受國恩最為深厚初無欲行解散之心且  
諸官兵尚屬尚之孝今之孝固儼然在京何嫌何疑

以致逃避嗣後諸官兵宜常念國恩釋去嫌疑各保身家妻子以副朕恩養保全至意其令將軍賴塔侍郎宜昌阿等宣布朕意咸使聞知

命大將軍簡親王喇布分兵守廣州總漕帥顏保率兵往鎮南雄韶州

上諭兵部廣東省會地關重要合計廣西見有大將軍簡親王兵及將軍莽依圖兵與都統馬齊等率往之兵每佐領共有二十八人今宜檄簡親王令簡軍中



精騎每佐領五人俾副都統博霽率之馳赴將軍賴  
塔軍協守廣東省城并檄馬齊速赴簡親王軍至所  
撤福建兵已就道者令其來京如未啓行仍暫留福  
建總漕帥顏保見在江西吉安令率所部速赴廣東  
視南雄韶州何地緊要酌量駐鎮以安輯人心

壬申趨大將軍簡親王喇布進兵

上諭喇布曰聞南寧距雲南邊界路僅七站向因逆賊  
尚之信馬承蔭背叛或未可輕進今皆已就撫復何

所瞻顧而遲延也見在廣西滿兵每佐領幾三十人  
宜選精強有馬者各十人益以綠旗官兵協力進剿  
賊可立破矣王其速圖之進兵之時令巴爾堪哈爾  
噶齊為夸蘭大責以軍前報効

壬午

詔以都統勒貝為鎮南將軍

上諭兵部頃聞將軍莽依圖以疾卒於軍中統兵重任  
不可久懸其以都統勒貝代莽依圖為鎮南將軍率

師進討

閏八月己丑授諸路將軍大臣進取雲貴招撫運  
餉機宜

將軍總督趙良棟奏偽將軍海潮龍納款繳送  
劉印欲聯絡迤西一帶身任前驅搖動滇中在  
此一舉請

勅諸路將軍大臣速發官兵糧餉至所指之地  
上諭今進取雲貴為期已近將軍烏丹率兵進瀘州取

合江仍兩路進取雲南湖廣大將軍將軍總督等宜  
速取貴州大將軍公圖海等趨所調陝西兵往四川  
海潮龍感戴國恩率衆獻地先機効順可嘉授為懷  
忠將軍令統所部為前導破賊至賊帥張國柱李本  
深王會高啓隆俱係舊臣或一時迫脅降賊亦未可  
定宜如招馬寶例書赦罪勅馳驛發趙良棟相機招  
撫陝西四川督撫等速趨運糧餉毋悞兩路大兵進  
剿機宜

辛卯

命都統馬九玉為將軍統福建藩下兵

和碩額駙耿聚忠奏福州府舊有旗兵三千今  
調千人駐防杭州其親戚及未披甲已退甲閒  
丁甚多彼等或移或留伏候

上裁

上諭尚書介山率兵還日即攜調杭官兵閒散人口留  
駐杭州以馬九玉為將軍統福州府靖南藩下官兵

侍郎吳努春且勿來還於九玉未至之先暫行管理

乙未

申諭諸路將軍大臣

上諭兵部今四方悉就蕩平惟滇黔餘孽尚爾稽誅前  
經會議各路官兵俱於八月內進剿茲師期已屆士  
馬飽騰正宜分路並進奮勇長驅掃除殘寇以靖邊  
圉爾部其速傳諭湖南四川廣西諸大將軍將軍督  
撫提鎮等整頓兵馬速行進剿勿得借端推諉延緩

時日有逗遛不前者即加重處又聞各路統領綠旗將帥不恤軍士令為滿州大兵蓋房秣馬及私行役使恣意虐害以致兵卒苦累如桑額標兵逃亡千餘皆由於此不思為將者與士卒甘苦相同加意愛養方可責其用命固惜卒伍惟便私圖貽誤軍機深為可惡爾部即通行嚴飭嗣後仍蹈前轍指名叅奏從重治罪

丙申

命將軍總督蔡毓榮軍中機事皆關白大將軍

大將軍貝子彰泰疏言蔡毓榮奉有調遣漢兵  
之

旨今進取貴州滿漢既已合兵若各自調遣彼此不相  
知會恐於事機無濟

上諭蔡毓榮進取貴州凡屬軍機俱關白大將軍商酌  
行之

癸卯尚之信等謀作亂伏誅



之信性凶悖酗酒嗜殺吳三桂反之信欲其父  
可喜從賊迫之不已可喜憤死之信遂降賊反  
其歸順也仍懷兩端

上數命進兵潮州湖南之信不行永興危急亦坐視不  
救後雖出師輒自引退總兵官時應運水師遊  
擊張瑜出勦賊之信俱密止之令頓兵不進及  
之信協勦廣西復與之璋等謀令以計調還廣  
州冒兵餉擅殺無罪人甚至希邀異數毀斥

乘輿於是藩人張永祥張士選來京告其諸不法事  
之信母舒氏胡氏都統王國棟總督金光祖巡  
撫金偁亦相繼疏列其罪

上遣侍郎宜昌阿與國棟等謀密檄總督金光祖提督  
哲勒肯總兵官班際威副都統金榜選等執之  
於武宣之信具疏辨

上不忍遽寘於理

命至京對簿之信謀益急令其弟之節等陰糾黨與誘

殺國棟欲為亂將軍賴塔急帥兵圍之之節等  
就擒賴塔等遂訊鞫悉得其狀而舒氏胡氏復  
飾言之信無謀叛逆前告變疏皆國棟等偽為  
也事聞下議政王貝勒大臣集議於是議政王  
等奏之信當謀反律母母弟凡同謀者俱棄市  
其諸弟之孝之璋之隆等雖不同謀法應褫職  
枷責

上諭平南親王尚可喜航海歸誠効力行間鎮守粵東

著有勞績及吳逆叛堅守臣節不肯從逆為逆子之  
信所逼憤恨殞命朕每念及深為憫惻其妻舒氏胡  
氏從寬免死并免籍沒尚之孝尚之璋尚之隆等俱  
從寬免革職枷責尚之信不忠不孝罪大惡極法應  
立斬姑念曾授親王從寬賜死餘悉按律正法至是  
諭至廣東之信等遂伏誅

丁未

命護軍統領佟佳等率兵赴四川總督哈占率兵趨永

寧都統范達禮率兵趨重慶諸路將軍大臣分道  
進征

上諭議政王等曰四川漢中滿洲大兵雖為數不少今  
當進定雲貴之際宜添發大兵在京滿洲蒙古每佐  
領下各護軍二人驍騎四人八旗漢軍共撥千人令  
護軍統領佟佳副都統得爾達莫達率赴四川既至  
將軍烏丹鄂克濟哈等酌量分為二路此兵未到之  
先四川萬一有警大將軍公圖海便宜調漢中滿漢

兵往援酌調西安之兵赴漢中檄到總督哈占即簡  
本標及別部精銳帥之馳赴永寧會烏丹軍凡綠旗  
兵俱令哈占統轄同心協力進定雲南都統范達禮  
率所部兵星赴重慶如兵少簡將軍噶爾漢兵率之  
前行大將軍貝子彰泰將軍蔡毓榮勒貝馬九玉總  
督金光祖等各路應期速進漢軍都統不必自京別  
遣其兵即令都統海爾圖率往原任總督張長庚布  
政使劉顯貴軍中著有能聲其以張長庚為副都統

劉顯貴為夸蘭大後凡委署夸蘭大叅領等官於滿洲蒙古漢軍廢員內察精壯者以聞佟佳等啓行

上諭兵部曰護軍統領佟佳等率兵抵懷慶時若由潼關經西安出棧道其途甚遠宜自懷慶由鄧州出商州直赴漢中此路險易遠近可行與否確探明白並開晰道里報部

甲寅

命都統馬奇率兵趨南寧

時都統希福奏南寧僻處邊疆兵丁缺馬今專  
從一路深入陸途險遠且無水路恐悞大事

上諭今進定雲貴期會已近廣西兵為數不少大將軍  
簡親王等以柳州南寧桂林駐兵之馬通融給將軍  
勒貝軍毋悞進勦機宜都統馬奇帥兵出京已久報  
稱方至永州其趨馬奇速赴南寧送往廣西之馬并  
移文嚴趨之

平定三逆方畧卷五十三



欽定四庫全書

平定三逆方畧卷五十四

康熙十九年九月丁巳

勅廣西四川將軍督撫等如期進剿

大將軍貝子彰泰奏將軍總督蔡毓榮等率綠  
旗官兵分三路於是月十二日自沅州進取貴  
州臣率滿漢兵於十八日由沅州啓行進取貴  
州

上諭今大將軍貝子彰泰等既奏進兵日期其移會廣西四川將軍總督等俱令如期速行勦賊

癸亥

命將軍噶爾漢等帥師勦滅譚洪諸逆

先是將軍總督蔡毓榮奏臣已率先統兵入貴

州境恐大兵進征之後內地兵單請調提督徐

治都駐常德防守

上諭總督董衛國先已攻克黃毛嶺蔡毓榮乃奏稱率

先統兵入貴州境非是著嚴飭其提督徐治都移駐  
事宜議政王貝勒大臣集議以聞於是議政王等議  
言蔡毓榮以內地兵單請調徐治都移駐常德  
宜如所請奏

上許之尋治都奏瀘州永寧叙州諸處俱陷譚洪等復  
叛夔州府民亦變

上諭今譚洪復叛夔州民變宜調荊州大兵并令將軍貝  
子準達帥兵兩路速行夾剿撲滅毋使滋蔓將軍噶

爾漢都統范達禮副都統色格簡荊州大兵每佐領  
三人率之提督徐治都母往常德亦率綠旗兵俱速  
赴夔州諸處勦滅叛賊以安疆土餘兵署副都統諾  
敏率之鎮守荊州仍檄貝子準達率兵前來夾勦毋  
失機宜尋復

諭常德要地亟宜堅守令襄陽總兵官劉成龍往鎮常  
德河南汝南總兵官周邦寧往駐襄陽趣將軍烏丹  
速勦永寧賊

將軍總督趙良棟奏湖廣大兵已集沅州永寧  
一路兵應直進雲南今將軍烏丹兵啓行將及  
一月猶未渡江如永寧不保賊勢愈張請

嚴飭湖廣兵取貴陽分兵以取遵義令烏丹擊敗永寧  
賊即乘勝進取雲南

上諭大將軍貝子彰泰等可率兵速取貴陽分兵以取  
遵義將軍烏丹往取瀘州行及一月逗遛猶未渡江  
不合其令速取瀘州剿除來犯永寧諸處賊寇湖廣

四川大兵各路分進廣西將軍大臣不得以兵士無馬為辭將軍勒貝體朕擢用之意速率大兵乘機由南寧進定雲南

乙丑遣戶部郎中額爾赫圖等赴軍前趣諸將進兵

上諭議政王等曰據將軍噶爾漢等奏逆賊譚洪率衆至巫山洪小醜耳我兵但奮力進擊彼自漸滅將軍噶爾漢提督徐治都等其溯江而上速定疆圉大將

軍貝子彰泰等果如前疏訂期亟進克復貴陽賊勢  
何至滋蔓今宜令彰泰同將軍蔡毓榮等於文到日  
馳往速取貴陽以圖遵義四川諸將亦因觀望致事  
乃爾若能奮擊雲貴出犯之賊則譚洪無所逃匿自  
當摧陷今宜令專意進剿無復却顧前此曾命總督  
哈占馳赴將軍烏丹軍今宜令由保寧江直進破譚  
洪以會烏丹并行文大將軍公圖海酌發軍中滿漢  
兵為之聲援以分賊勢至運餉四川不由夔陵江俱

自陝西轉運叙州兵糧度可無虞頃今護軍統領佟佳等率增發四川滿兵赴原指之地其漢軍官兵一千人文到日即由荊門州一月內赴彛陵鎮守戶部郎中額爾赫圖馳赴彛陵趣將軍噶爾漢等兵速滅譚洪諸賊額爾赫圖凡事俱準蘓赫臣例以行吏部郎中范承勲亦馳驛追及副都統張長庚趣其兼程而往一月內抵彛陵范承勲仍自彛陵趣官兵追及噶爾漢等軍與額爾赫圖同趣官兵擊賊又



宣諭四川諸將曰

皇帝勅諭將軍烏丹鄂克濟哈趙良棟總督楊茂勲巡撫杭愛提督王之鼎近覽都統噶爾漢提督徐治都奏譚洪叛逆夔州巫山亦俱變亂朕思譚洪變起倉猝四川兵民聞之必為震動洪雖盤踞萬縣實屬疥癬但破出犯之賊則洪無路可歸自必授首事所以至此者皆由各將軍大臣於所分撥之路逗遛不進以致若此今諸路調兵分途進擊爾等可速長驅勿

以譚洪等小醜之故遂猶豫不前并以大兵雲集譚洪不日殲滅曉諭四川通省兵民爾等其速慰兵民之心以副朕委任至意

命將軍賴塔為大將軍帥師進取雲南

上諭議政王等曰頃因逆賊侵徧四川滿漢大兵已諸路進勦大將軍貝子彰泰將軍總督蔡毓榮等於是月十二日以次進定貴州今廣西一路亟宜速入以定雲南將軍賴塔在福建廣東勞績素著可授為大

將軍赴廣西調遣廣西滿漢大兵由南寧直進速定  
雲南賴塔行日選廣州大兵內精銳有馬者或五百  
人或千人親帥之赴南寧廣西所有一應大兵俱聽  
簡擇率往副都統博齊統餘兵暫守廣東應給賴塔  
勅印可速送往其原在平南藩下官兵如可帶往聽  
賴塔酌量率之前行

命副都統覺羅吉哈禮等領兵赴沅州

上諭議政王等曰沅州兵出征日久今應更代可發每

旗前鋒三十人每佐領護軍一人驍騎三人內府兵  
六百人漢軍每佐領二人付吉哈禮席布率之前往  
并撥內廐及兵部馬匹同發沅州軍前

戊辰趣將軍噶爾漢等進兵

上諭兵部覽安塘筆帖式蘇拜報九月初六日副都統  
色格每佐領兵一人往守彝陵夫譚洪向在保寧屢  
經奔敗窮困兵仗全無今乘黔賊侵犯瀘州招集無  
賴持挺肆行劫掠將軍噶爾漢等前曾疏言士馬飽

騰嚴裝以待一聞賊警即當赴勦今噶爾漢范達禮  
徐治都等不親身馳入巫山夔州勦除叛逆小醜乃  
遣副都統色格率每佐領兵一人往鎮彝陵殊屬不  
合如此遲延觀望儻此寇與黔賊合勢彼時破之不  
綦難乎噶爾漢等聞命即統率官兵星夜馳赴巫山  
夔州扼其要害俾游行羣醜不致滋蔓速為勦除若  
仍逗遛致逆賊與黔賊合勢至於猖獗將噶爾漢等  
治以失機軍機之罪爾部速行檄知未幾噶爾漢疏

言都統范達禮病甚不能同往

上諭范達禮令在荊州養病俟病愈仍追及噶爾漢軍  
進兵之際轉運糧餉關係甚重地方各官儻有違悞  
即以軍法從事

丙子

命護軍統領佟佳等率兵赴彝陵荊州副都統覺羅古  
哈禮等率兵赴四川

上諭議政王等曰今大將軍貝子彰泰率兵進取雲貴

夔陵荊州諸處宜發大兵護軍統領佟佳所率之兵  
令母往四川撥每佐領護軍驍騎各二人佟佳同副  
都統一員率之自荊門州赴夔陵餘兵付一都統率  
之俾兼程赴荊州副都統吉哈禮等率兵赴四川

辛巳

命將軍王進寶往鎮保寧諸處

上諭兵部進川大兵分路前取雲貴近又報四川小醜  
竊發保寧漢中一帶關係重要其移文將軍王進寶

馳赴保寧兼守漢中諸處

十月丁亥

命給事中莫洛等傳諭四川諸將學士額庫禮等趣廣  
西兵速進雲南

上諭議政王等曰四川統兵諸將似有不睦之形遣給  
事中莫洛等往諭之併詳察地方情形學士額庫禮  
等往廣西收集滿漢官兵盡付大將軍賴塔統領趣  
令進取雲南復



諭學士額庫禮郎中阿濟力曰爾等到南寧如賴塔未  
至將軍勒貝等簡兵已畢即趣令啓行於途中候賴  
塔以進如勒貝等簡兵未畢當檄趣賴塔速來到日  
即趣令前進署巡撫事理事官麻勒吉等委賢能司  
道官運致糧餉毋使有悞至分選滿漢官兵如有爭  
競爾等即為裁決俟大兵啓行而還

己丑趣都統馬奇等進兵

上諭議政王等曰馬奇等出師以來即耽延時日遲緩

事機今大將軍賴塔等自南寧進取雲貴馬奇等  
宜率兵急進如仍耽延遲緩兵部嚴察議處

甲午解將軍烏丹任

將軍總督趙良棟疏劾烏丹曰賊寇侵犯仁懷  
因而失守將軍烏丹擁重兵二萬不急赴援以  
致永寧復陷貽誤邊疆

上諭成都去永寧路不踰七八百里烏丹不急赴援遲  
至六十餘日貽誤已甚烏丹不可仍為將軍其速解

任攜勅印還漢中同大將軍公圖海鎮守其四川官兵俱付將軍鄂克濟哈與趙良棟會商進勦蜀中情形不時奏報

命四川諸將速取永寧建昌署副都統熙符率兵馳赴漢中

上諭議政王等曰前以蜀地與雲貴相接通道甚多逆賊必來侵犯而將軍總督趙良棟題報我兵已抵金沙江檄良棟及烏丹鄂克濟哈等於諸要路俱立營

浚濠築壘堅為防守汛守官兵糧餉運給勿悞魯特  
行曉諭今逆賊攻陷永寧建昌路阻在蜀諸將軍大  
臣率如許滿漢官兵所遏禦者何事若遵前諭加意  
奉行永寧建昌何至失陷譚洪彭時亨何至變亂彼  
等殊負委任之意今宜協力勦却逆賊速行恢復永  
寧建昌諸處至漢中諸地所係殊要宜授叅領熙符  
為副都統簡傅爾扈等官併前鋒及每佐領護軍驍  
騎各三人兼程率往西安以巡撫布政司文武官員

馬匹易其疲馬馳赴漢中

丁酉

命將軍王進寶調兵馳赴保寧

進寶奏臣標兵除調征湖廣其餘

臣

子用予統

領進勅又陝西督臣哈占調往二千餘人臣今

無兵可統不得不於臣標攜回及留守步兵內

姑為抽選併與固鎮營中量行調撥以足千有

餘人之數更請

命督臣以固鎮官兵發還付臣統轄

上諭逆賊既侵犯四川譚洪彭時亨復叛保寧最屬要地今將軍王進寶速調固原各營官兵兼程馳赴保寧規定蜀疆陝督哈占兩次所調之兵仍令王進寶統領

命將軍噶爾漢等速赴夔州剿賊

貝子準達奏逆賊譚洪彭時亨等攻陷涪州

上諭將軍噶爾漢等選每佐領兵三人提督徐治都親

統漢兵速赴夔州諸處勦滅叛寇

己亥

申命四川督撫協供大臣糧餉

總督哈占奏臣進兵保寧所需糧餉若支運自秦中見貯之米為數有限未足於用儻督餉各官不盡心料理軍需告匱貽悞匪輕

上諭兵餉關係要緊四川督撫同郎中蘇赫臣速委賢能司道董理蜀中諸軍糧儲無悞師行

命總督哈占速赴保寧

哈占奏逆賊譚洪彭時亨等合而為一去保寧  
不遠糧餉皆由此而過實關要害臣自漢中往  
保寧恐所統兵無幾戰守不足請

勅護軍統領佟佳等遣兵速往應援

上諭前已令副都統吉哈禮等秣馬速進四川保寧順  
慶所係殊要總督哈占速往保寧偕總兵官高孟勦  
滅逆賊



勅陝西甘肅巡撫提督諸臣分兵固守畧陽陽平諸處  
總督哈占奏畧陽為水陸交會陽平為四川孔  
道廣元寧羌又屬全省咽喉俱轉餉必由之地  
逆賊譚洪等肆行猖獗此數處官兵不過百餘  
人難以防禦而部推陽平叅將高明霄尚未抵  
任請撥兵保護

上諭略陽陽平寧羌廣元諸處皆糧運所經且為大兵  
後路關係最鉅陝西甘肅巡撫提督其酌撥官兵加

意保護陽平叅將高明霄速趣之任如仍延緩嚴加  
議處

辛丑

申命將軍噶爾漢等勦滅譚洪諸賊

上諭噶爾漢等曰覽將軍等奏副都統色格等恢復巫  
山縣生擒偽總兵知爾等疾馳而進朕心甚慰今宜  
速進殲除逆賊安定地方譚洪彭時亨等諸逆或勢  
威投降或竟行勦滅其同族之人悉皆誅戮妻子家

口賞給有功官兵

甲辰

諭大將軍公圖海防勦機宜

上命給事中莫洛等傳諭圖海曰爾前奏暫停諸處進兵其說雖是但停止進兵徒使賊寇滋蔓於事無益前爾面奏請停進兵惟朕力催岳州始得恢復湖廣逆賊悉皆潰敗後又請暫停取四川朕又力催四川遂爾蕩平今賊以全力逼犯四川若從廣西南寧湖

廣沅州進取貴州則寇蜀之賊自當敗遁從此諸逆漸平地方悉定將領士卒可踴躍凱旋矣至投誠官員不可深信務留置左右時加防範朕已屢行密諭今譚洪彭時亨等復叛肆行侵擾朕向謂此輩俱在爾軍中不意竟置之別所此等背恩反叛之輩受爾何恩而乃深信如是也嗣後宜密防之

乙巳申飭議政王大臣

上諭內閣大學士等順承郡王勒爾錦貝勒察尼率領

大兵出征不思長驅効力平定疆圉惟向督撫司道各官索取財物冀歸家之時安享饒裕前曾屢經申飭置若罔聞悞國擾民老師失機之罪莫此為甚朕嘗遙度令造船圍困岳州幸賊寇窮蹙疆土以次底定否則不知若何矣況我

太祖

太宗之時軍法甚嚴今議政王大臣等豈可因事已定漠不經意不按事實草率定罪乎王貝勒若自謂未歷

戎行係與衆商酌而行自後寧遂不用兵若俱以未  
歷戎行為辭將令何人統帥耶王貝勒係朕宗親理  
宜寬宥但悞國大事罪不容逭總之在他人或可原  
宥在王貝勒等實難恕也其諭議政王大臣等知之  
臣謹按賞罰者人君之大柄也惟信賞必罰  
然後有功者知勸而有罪者知懲當吳逆初  
叛勒爾錦察尼即統兵征討乃退縮不前糜  
餉勞師屢失機會罪誠大矣獨是勒爾錦等

均屬懿親且事已平定即稍為寬假無不可者而我

皇上心存至公謂在他人或可原宥王貝勒等實難容恕因

命議政王大臣等嚴覈勒爾錦等罪狀重加處分以肅軍紀此所謂賞不遺疎遠罰不私貴近即古聖王大公至正之道也

戊申

諭諸路將帥進兵機宜

大將軍貝子彰泰奏報本月十二日克鎮遠府  
賊夜遁大兵追勦復偏橋等衛

上諭大兵已復鎮遠追勦逆賊鎮遠至貴陽道平坦料  
賊不守貴陽必據鷄公背鐵索橋諸處茲大兵進征  
係平定疆域拯救生民大將軍將軍大臣等務同心  
協力以濟大事速取貴陽即分兵取遵義諸處儻遲  
疑稽延如四川大臣彼此不睦貽誤兵機軍法顯然



必不爾宥前恢復四川時在川大臣曾累奉固守疆  
圍堵禦賊寇之旨因其不睦致疎防守使逆賊狂逞  
失陷地方不能如期進定雲南今大將軍貝子彭泰  
等兵已復鎮遠規取貴陽遵義遵義係賊後路寇川  
逆賊勢必退歸在川將軍及大臣等宜偵探確信乘  
勢長驅蕩平疆圉如仍前不睦遲疑稽延貽誤兵機  
定行治罪大將軍賴塔等亦應統領廣西滿漢大兵  
速進雲南毋失機宜尋復

諭兵部據報將軍噶爾漢提督徐治都等恢復夔州但不知重慶消息可否相通令噶爾漢等速行奏聞至萬縣在萬山之中噶爾漢等防禦諸路其熟計保全今夔州既復宜令總督哈占速從保寧進勦哈占速進則賊不日撲滅至兩路分兵恢復鎮遠夔州事宜應移會在蜀大臣併檄知廣西大將軍賴塔等乘此機會速定雲南

辛亥

勅湖廣偏沅巡撫轉餉軍前

學士佛倫奏軍前糧米僅供三月當預為接濟  
令偏沅巡撫韓世琦應運協餉十餘萬石臣等  
親詣河干未見一船運到請

勅速運以濟軍需

上諭軍糧事關重要韓世琦至今無一船運到殊負職  
掌至於湖北採買之米亦尚稽延未運令湖廣偏沅  
二巡撫星夜轉運軍前如稍稽延以貽誤軍需治罪

壬子革總兵官朱衣客職

將軍總督趙良棟疏劾朱衣客身荷邊疆重任  
且係旗下舊人率官兵八千往援建昌不能破  
賊乃於天王廟失利棄越雋衛要地不守渡河  
却回

上諭朱衣客懦弱却回輕棄汎守天千軍法著革職嚴  
拘擬罪以聞

平定三逆方畧卷五十四

欽定四庫全書

平定三逆方畧卷五十五

康熙十九年十一月戊午

詔封蒙古貝子固魯斯希布為貝勒

上諭議政王等曩神木縣變亂固山貝子固魯斯希布  
即遣都統沙丹率兵進剿隨語諸台吉云我曹此際  
正宜不惜身命報効朝廷因帥兵馳往遂得恢復諸  
路城堡可嘉其封為多羅貝勒

辛酉

命定順承郡王勒爾錦等罪

議政王等奏順承郡王勒爾錦貝勒察尼帥師討賊不速扼要害乃退縮不前老師糜餉坐失事機幾致悞國應革去王貝勒併議政及宗人府之職籍其家屬財產仍行拘禁貝勒尚善公蘭布不速勒賊寇恢復疆土退縮貽悞俱宜從重議處但既卒於軍應革其多羅貝勒鎮國公

都統珠滿不速據岳州前驅破賊退縮不前幾  
致悞國應革去都統拜他喇布勒哈番佐領及  
所加之級立絞籍其家其妻與未分家之子並  
交內務府都統鄂鼐不速據要地渡江破賊坐  
守彝陵聽賊渡江竊據要害退縮不前幾致悞  
國應革去都統一等阿達哈哈番兼一拖沙喇  
哈番佐領及所加之級鞭一百不許折贖本身  
及妻未分家之子沒入官家產交內務府護軍

統領伊勒都齊棄太平街不守不勦滅虎渡口  
賊寇致太平街失陷應革職正法但已物故宜  
革去一等阿達哈哈番兼一拖沙喇哈番籍沒  
家產其妻及未分家之子並交內務府額司泰  
不渡江速據要害長驅勦賊又不攻取岳州退  
縮貽誤宜從重議處但已物故宜籍沒家產給  
予本主散秩大臣多謨克圖身為參贊率蒙古  
兵前往不即協力渡江恢復疆圉得賊空營冒



為已功復不力拒虎渡口出犯之賊致已獲之  
太平街復陷於賊宜革去散秩大臣拜他喇布  
勒哈番及所加之級副都統巴喀得賊空營亦  
冒為已功不力拒虎渡口出犯之賊致太平街  
復陷宜革去副都統佐領及所加之級公圖納  
赫不速勦賊耽延時日應行察議但賊已固守  
之後伊始至軍且屢有渡江擊賊之請應免察  
議署前鋒統領噶爾弼係貝勒尚善參贊坐延

時日寸步不前及奉

明諭申飭仍不思殫力破賊推諉巧飾執意退縮希冀  
全身不取岳州亦應察議但已物故毋庸議疏

入

上諭勒爾錦不渡江剿賊平定疆圉遷延瞻顧貽誤國  
家大事情罪重大勒爾錦可削去郡王併議政宗人  
府之職仍令羈禁察尼宜如議處分但既克岳州且  
從前有效力之請可從寬免羈禁籍沒革去貝勒併

議政宗人府之職為閒散宗室尚善可革去貝勒蘭布可革去鎮國公珠滿從寬免死可革職鞭責一百不許折贖仍籍沒其家鄂鼐屢戰湖中又恢復岳州可革職從寬免籍沒鞭責伊勒都齊多謨克圖巴喀俱革職餘依議行

命哈占為川陝總督解楊茂勲總督任

上諭吏部哈占改授川陝總督兩地軍民並令統轄均其勞逸楊茂勲可解四川總督任率所屬兵隨大兵

進定滇黔

甲子

命大將軍公圖海調兵赴四川護軍統領佟佳等自重

慶赴瀘州

將軍烏丹奏蜀省諸要路應分兵防守但兵數有限請速調發

上諭大將軍公圖海身任疆場署副都統熙符所帥之兵至漢中時宜如何鎮守地方聽其酌行移檄副都

統覺羅吉哈禮席布等速行前往并移檄護軍統領  
佟佳等疾速啓行往會將軍噶爾漢等軍到日如重  
慶可通即由重慶迅赴瀘州剿賊

命將軍噶爾漢等分兵守巫山夔州

噶爾漢奏臣等相繼進剿敗遁之賊與四川雲

陽賊合浚壕築壘水陸相拒臣念巫山夔州乃

大兵後路須兵固守

上諭將軍噶爾漢提督徐治都率兵恢復四川巫山夔

州更進取雲陽諸處俱關甚要賊方合力嬰城拒敵其移檄守荊州副都統諾敏發紅衣礮八礮手各二人星夜送至軍前備攻城之用徐治都所增標兵五千招募不免遲緩其以均州房縣所裁鎮標之兵及內地綠旗兵調往至巫山夔州諸要地速發鎮守副都統得爾德可率兵往夔陵彈壓地方

大將軍貝子彰泰奏官兵恢復貴陽

彰泰等恢復鎮遠即分遣滿漢官兵進取貴陽

十月十七日復平越府并復新添龍里二衛二  
十一日我兵直抵省城逆渠吳世璠偽將軍劉  
國炳吳應麟等率衆夜遁遂復貴陽府又招李  
本深降之其餘安順石阡都勻諸府以次收復  
貴州全定

乙丑

嚴飭總督哈占速赴四川夾剿寇賊

上諭議政王等曰將軍噶爾漢提督徐治都以師深入

四川兩次擊敗賊寇恢復巫山夔州今又圍困雲陽縣總督哈占啓行已久何以至今未達其速統兵從後夾勦如復仍前遲延觀望貽誤軍機即以軍法從事決不姑恕速移檄趣之

命郎中范承勲督餉給將軍噶爾漢軍

上諭兵部將軍噶爾漢等深入勦賊轉運糧餉最為重要郎中范承勲已至彝陵自湖廣進蜀一路官兵糧餉范承勲身自督趣毋誤轉運



命四川漢中諸將乘機勦賊

上諭議政王等曰四川逆賊猖獗皆由諸將畏怯瞻顧  
不竭力勦禦所致今大將軍貝子彰泰等擊敗賊渠  
吳世璠恢復鎮遠平越貴陽諸府四川漢中將軍大  
臣宜乘此機會併力進勦毋得仍前觀望坐失事機  
丙寅

命總督哈占等招集逃兵

大將軍公圖海奏瀘州逃散綠旗官兵不敢還

營今永寧失陷建昌路阻若不速行收撫將來  
或投入賊營或相聚為亂其害匪細宜招撫還  
營仍前給糧補伍

上諭大將軍公圖海所奏甚善宜令總督哈占將軍王  
進寶速招逃兵入伍俾其贖罪圖功

庚午

命總督哈占暫駐保寧

哈占奏臣於十月二十四日已抵保寧一面酌

撥官兵防守招化蒼溪諸隘一面揀選精銳付  
總兵官高孟一路由順慶蓬州進取營山一路  
由南部進取營山復由營山會取渠縣俟勦滅  
逆賊彭時亨平定川北之後再進勦川東逆賊  
譚洪

上諭保寧關係重要總督哈占暫駐鎮守俟將軍王進  
寶到日哈占即率大兵勦譚彭二賊未幾總兵官高  
孟擊敗賊兵斬殺甚衆營山渠縣相繼恢復

甲戌

命佛尼勒為建威將軍

將軍鄂克濟哈奏烏丹解任後兩路官兵俱付

臣統領但建昌永寧相去千餘里一身不能兼

顧乞另設一帥進取永寧

上命署西安將軍事佛尼勒為建威將軍調遣永寧一路滿漢大兵與總督哈占會商剿賊

十二月丁亥

命大將軍貝子彰泰進定雲南總兵官王用予速取遵義

上諭議政王等曰今貴州底定大兵宜速取雲南況大將軍賴塔兵已抵南寧大將軍貝子彰泰毋分兵向遵義即速行進定雲南彰泰軍中統領綠旗兵將軍總督提督隨征總兵官甚多兵數亦衆彰泰等進兵時可於諸大臣內酌留貴陽厚其兵力俾守黔中至固原總兵官王用予前曾請取遵義今宜令用予速

取遵義即鎮守之

庚寅

命護軍統領佟佳等速取夔州副都統得爾德等鎮守  
夔陵諸處

湖廣巡撫王新命奏逆賊譚洪侵犯夔州掠取  
糧艘

上諭夔州乃運糧要地令護軍統領佟佳署副都統張  
長庚率兵速取夔州并令王新命速發徐治都新添

標兵前往更檄副都統得爾德總兵官嚴宏加意防  
守彝陵諸要害

勅總督哈占速討譚洪諸逆

哈占奏

臣今奉

命為川陝總督或駐兩省適中之地調兵勦寇或俟將

軍王進寶至保寧

臣

仍親往滅賊伏請

上裁

上諭大將軍貝子彰泰等已平貴州進取雲南大將軍

賴塔已統率大兵進發總督哈占可速滅逆賊譚洪  
彭時亨等即遵前旨協同滿漢大兵進討如或違誤  
定如前旨處分

壬辰

授諸將平滇後應行事宜

上諭議政王等曰今大將軍賴塔等率兵進定雲南不  
日自當恢復一應事機俱宜豫定移知大兵直抵賊  
巢若賊不能支窮蹙來降勿謂輸誠待以寬典逆賊



吳世璠吳應麒胡國柱夏國相等諸首惡俱令駢斬  
傳首京師至盡節官員其察明以聞大將軍彰泰賴  
塔等會合之時宜作何留兵鎮雲南及宜發還餘兵  
並詳議具奏

甲午

命總兵官劉成龍赴將軍噶爾漢等軍署副都統諾敏  
守常德

上諭兵部覽將軍噶爾漢提督徐治都奏請調總兵官

劉成龍赴伊軍前調荊州副都統一員鎮常德但今  
大兵直抵雲南湖南已入內地常德不必添發滿兵  
劉成龍可速赴噶爾漢等軍前署副都統諾敏率所  
部往鎮常德尋諾敏奏所部之兵為副都統得爾德  
分往又分兵押西洋礮赴噶爾漢軍餘兵甚少

請

勅得爾德以帶往兵五百人發還

臣部

上諭彝陵副都統得爾德兵守巫山巴東諸要害兼顧

將軍噶爾漢兵餉道不可撤還諾敏率所部兵赴常德送破兵還亦令前往

乙未大將軍貝子彰泰奏官兵恢復永寧州

彰泰等既復貴陽即令提督桑額總兵官陳珀等率兵進取雞公背鐵索橋十一月初十日我兵敗賊克永寧并復雞公背鐵索橋諸處賊焚鐵索橋遁

壬寅將軍王進寶請率兵進取雲南

上不許

進寶奏請撥各鎮營兵合萬五千人界臣統領

進取雲南


上諭因保寧最為要地故特令將軍王進寶鎮守以綏輯全蜀今大兵分路進定雲南將軍鄂克濟哈趙良棟等已帥兵勦賊由成都啓行逆賊譚洪等尚未殄滅王進寶可仍遵旨鎮守保寧

甲辰

命副都統得爾德等遣兵守巫山巴東諸處

將軍噶爾漢奏請自巫山巴東以至彝陵俱令  
副都統得爾德等鎮守臣等庶可撤防守地方  
之兵合力勦賊而餉道亦可無虞

上諭副都統得爾德巡撫王新命總兵官嚴宏猷撥滿  
漢兵固守巫山巴東彝陵諸處保護糧儲勿致踈虞



平定三逆方畧卷五十五